



Utanríkisráðuneytið
Rauðarárstíg 25
105 REYKJAVÍK
postur@utn.is

Reykjavík, 21.09.2020
Tilvísun vor: M-2020-260/00.11

Efni: Hagsmunagæsla Íslands gagnvart ESB - Forgangsmál 2020-2021, mál nr. 178/2020

Vísað er til máls nr. 178/2020 í samráðsgátt stjórnvalda þar sem kynnt eru til umsagnar drög, unnin í samvinnu allra ráðuneyta, að lista forgangsmála í EES-samstarfinu fyrir árin 2020-2021. Landsvirkjun þakkar tækifærið að gefa umsögn um drög þessi.

Umsögn Landsvirkjunar

Landsvirkjun fagnar því að birtur sé listi yfir forgangsmál vegna hagsmunagæslu Íslands gagnvart ESB fyrir árin 2020-2021. Framkvæmdastjórn ESB, Evrópuráðið og Evrópuþingið hafa nú mörg stór mál til vinnslu sem varða orkumál og hefur Ísland verulega hagsmuni af þróun þeirra sem nauðsynlegt er að fylgjast vel með. Nýting og verðmætasköpun endurnýjanlegra orkuaauðlinda er ein af undirstöðum lífskjara á Íslandi og drifkraftur efnahagslegra framfara og sjálfbærrar þróunar.

Orkufyrirtækin á Íslandi og samtök þeirra Samorka eru meðal mikilvægustu hagsmunaaðila í þessari vinnu og við hvetjum stjórnvöld til reglubundinnar upplýsingagjafar og samráðs við hagsmunaaðila vegna hagsmunagæslunnar. Aðrir mikilvægir hagsmunaaðilar eru raforkunotendur, stærri og minni, auk t.d. Samtaka atvinnulífsins og Samtaka iðnaðarins.

Á vettvangi ESB eru nú ásamt öðru unnið að tveimur stórum málum sem tengjast orkumálum, annars vegar þróun orku- og loftslagsstefnu ESB til 2030 (Clean Energy for All Europeans), sem hefur verið nefnd „hreinorkupakkinn“ og hins vegar Græni evrópski sáttmálinn um kolefnishlutleysi 2050 (The European Green Deal).

Með þessum málum hyggst ESB stefna að kolefnishlutleysi og auka veg endurnýjanlegrar orku, stuðla að orkuskilvirkni og orkusparnaði, innleiða sveigjanlegri orkumarkaði og stuðla að auknu sjálfstæði og sjálfbærni neytenda svo eitthvað sé nefnt. Eins og nefnt er í drögum að forgangslistanum tengjast síðan fleiri nýlegar stefnur sem undir þessi mál falla orkumálum beint eða óbeint, til dæmis ný iðnaðarstefna ESB.

Dæmi um mál sem Landsvirkjun telur mikilvægt að íslensk stjórnvöld hugi að varða t.d. mögulegar niðurgreiðslur og skattaávilnanir innan ESB til orkuframleiðenda og orkunotenda, ETS kerfið, mögulega kolefnisskatta á vöru frá ríkjum utan EES, kerfi vegna upprunaábyrgða endurnýjanlegrar orku og mál er varða tengingar orkukerfa ólíkra markaða. Í þessum málum og þeim stefnum, markmiðum og regluverki sem þeim fylgja þarf að gæta vel að hagsmunum Íslands og eftir atvikum sérstöðu en hér er nær öll raforka unnin úr endurnýjanlegum orkugjöfum.

Með þessari umsögn vill Landsvirkjun lýsa yfir ánægju með að mál er tengjast orkumálum séu ofarlega á forgangslista stjórnvalda þegar kemur að hagsmunagæslu Íslands gagnvart

ESB auk þess, sem áður hefur verið nefnt, að hvetja til aukins samráðs við helstu hagsmunaaðila í orkugeiranum við vinnslu þeirra.

Virðingarfyllst,



Hörður Arnarson,
forstjóri

ÞÓRÓLFUR NIELSEN

Þórólfur Nielsen,
forstöðumaður stefnumótunar og sjálfbærni